



Kurtzer bericht von des Herren Abendmal.

<https://hdl.handle.net/1874/430458>

kurzer Bericht von des
HERREN Abendmal.

Gestellt

Durch M. IOHANNEM PISCATO-
rem, Professore[m] der heiligen Schrifft
in der Graefflichen Schul
zu Herborn.



Gedruckt zu Herborn in der Graeffschafft
Nassaw/Caseneubogen/2c. durch
Christoff Raben.

M. D. LXXXIX.

Vorrede an den Christlichen Leser.

Christlicher Leser/ ob schon jeko viel jahr
hero vil guter bücher vom Abendmal des H E X
X E N von vielen gelehrten vnd getrewen Lehrern ge
schrieben vnd in öffentlichem truck außgangen sind/
Also daß es billich einen beduncken mag / es seye vn
nötig/ etwas fermer hievon zu schreiben: Jedoch auff
begehren des Wolgebornen Herrn/ Herrn Johan des
Eltern/ Grauen zu Nassaw/ Katzenelnbogen/ 2c. meir
nes gnedigen Herrn / hab ich diesen kurzen bericht ge
stelt vnd zu trucken gegeben/ der guten zuversicht/ es
werde diese einfeltige vnderweisung bey vielen ihren
nutzen schaffen/ Also nemlich/ daß etliche dardurch in
der erkäten warheit gesterckt / andere aber zur erkant
nus gute anleitung darauß bekommen werden. Das
gebe G Dtt vnser Himlischer Vatter in krafft seines
heiligen Geistes/ durch Jesum Christum vn
sern H E X X E N/ Amen.

opffer: Daher es auch genennet worden Eucharistia, das ist danck-
 sagung. Ein solches danckopffer war im alte Testament die schlach-
 tung vnd niessung des Lambs/so man nennet das Osterlamb/ wel-
 ches genennet ward der vberschritt des H. A. N. (auff Hebreisch
 Pesach: darfür in den schriftten der Aposteln vnnnd Euangelisten
 gebraucht wirdt das wörtlein Pascha) darumb daß es war ein ge-
 denckzeichen vnnnd erinnerung der Erlösung der kinder Israel auß
 Egypten/ welche erlösung damals geschehen war / da des H. A.
 N. Engel/welcher die erstgeburten der Egypter zu tod schluge/
 für den häusern der kinder Israel/ deren pfoften mit des Lambs blut
 besprenget waren/fürüberschritte vnd niemand von jnen vmbbrach-
 te. Gleich wie nu die kinder Israel dasselbe Lamb auß Gottes be-
 fehl assen zur danck-sagung für die Erlösung auß Egypten / vnnnd
 gleich mit für die Erlösung vom gewalt des Teuffels/ welche durch
 jene war fürgebildet / vnnnd zu seiner zeit sollte durch Christum ver-
 richtet werden: Also wir Christen essen des H. A. N. Abendmal
 zur danck-sagung für solche erlösung die schon allbereit durch Chris-
 tum verrichtet vnd vollbracht ist. Vnd also dienet das H. Abends-
 mal zu des H. A. N. Christi göttlicher ehre.

Zu vnserm trost aber dienet es also / so fern es verordnet ist zu
 einem Sacrament/das ist / zu einem göttlichen warzeichen / sigill
 vnnnd pfand / dardurch vns Christus bezeuget / daß gleich wie das
 Brot gebrochen vnd der Wein in einen becher oder trinckgeschirz
 eynzeggossen wirdt: Also seye sein leib am creus gebrochen / das ist/
 mit nägeln durchstoehen / jämmerlich gemartert vnnnd endlich von
 seiner seelen gerissen worden / Item sein blut seye auß seinen wun-
 den gestossen vnd vergossen worden/für eins.

Fürs ander: Gleich wie das gebrochen Brot vnd der eynges-
 gossene Wein vns dargereicht/vbergeben vñ mitgetheilet wirdt: Als
 so seye sein Leib für vns gegeben/vnd sein Blut seye für vns vergos-
 sen / daß wir nemlich dardurch haben verzeihung der sünden vnnnd
 versöhnung mit Gott.

Fürs

Fürs dritte: Gleich wie wir das gebrochene Brot essen/ vñnd den eyngegossenen Wein trincken vñnd davon gespeiset vñnd erquicket werden am leib: Also essen vñnd trincken wir geistlich/nemlich durch den glauben/den gecreuzigten Leib vñnd das vergossene Blut Christi/ vñnd werden davon gespeiset vñnd erquicket an vnsern seelen / In dem wir empfinden vñnd fühlen die huld vñnd gnad Gottes gegen vns/ als welcher vns durch seinen sohn vnsern Herrn Christum versöhnet seye/ vnser sünden vergeben habe/ vns durch seinen heiligen Geist je lenger je mehr als seine liebe kinder erneuern vñnd widergeben wolle zum ewigen leben. Vñnd also dienet das heilige Abendmal zu vnserm trost.

Vñnd zu diesem trost gehöret die lehr von der gemeinschafft die wir haben beydes an Christo vñnd mit Christo. Denn das heilige Abendmal/ in dem es vnsern Glauben stercket / so bestetigt es vns in dieser gemeinschafft: Sintemal durch den glauben haben wir gemeinschafft an Christo vñnd allen seinen gütern vñnd wolthaten/ an seinem gecreuzigten Leib vñnd vergossenen Blut/ an verzeihung der sünden/ an der kindschafft Gottes/ an der ernewrung des H. Geists/ vñnd endlich am ewigen leben. Desgleichen durch den glauben haben wir gemeinschafft mit Christo als vnserm haupt: sintemal der heilige Geist/ der in Christo nach seiner menschheit wohnet/ nach welcher er den geist ohne maß empfangen hat / derselbe Geist wohnet auch in vns als den gliedern dieses haupts. Dann Christus ist das haupt der gemeine/ die gemeine ist der leib dieses haupts/ vñnd ein jeder glaubiger ist ein glied dieses leibs/ wie Paulus lehret Ephes. 5. Gleich wie nun Christus die gaben des heiligen Geists empfangen hat ohne maß vñnd vberschwemcklich / also empfangen alle glaubigen von Christo als ihrem haupt eben dieselbige gaben/ aber nach der maß/ wie ihnen Christus dieselbige schenckt oder mittheilet. Dann gleich wie auß dem haupt in die andern glieder des leibs ein krafft fleusset denselbigen empfindnis vñnd bewegung mitzutheilen/ also auch der heilige Geist fleusset gleichsam auß Christo in alle vñnd jede gläu-

bigen/ihnen mitzutheilen die wahre erkandnus vnd liebe Gottes.
 Vnd also haben wir gemeinschafft mit Christo an den gaben
 des heiligen Geistes / vnd an dem geistlichen leben / welches auß sol-
 chen gaben entspringt. Zum andern/haben wir auch gemeinschafft
 mit ihm am leiden vnd verfolgung von wegen der warheit/vnd dar-
 gegen an der himlischen herligkeit. Daher sagt Christus zu Pau-
 lo/als er die Christen verfolgte/Saul/Saul/was verfolgstu mich?
 Vnd Paulus spricht/Leiden wir mit im/so werden wir auch mit im
 herrschen. Vnd dieser trost / den wir auß der gemeinschafft mit
 Christo als vnserm haupt haben/ist desto grösser/dieweil diese verei-
 nigung vnauflöflich ist / vnd also die vereinigung der glieder des
 menschlichen leibs mit irem haupt weit obertrifft. Denn ja diese von
 ihrem haupt können auffgelöset vñ abgesöndert werden/ Wir aber/
 die wir durch wahren Glauben Christo vnserm haupt enverleibet
 vnd vereiniget sind / werden von diesem vnserm haupt in ewigkeit
 nicht abgesöndert werden. Denn Christus ist seines leibs Heyland/
 Ephes. 5. v. 23. vnd ist ein ewiger Heyland / beydes so viel seinen vere-
 dienst/vnd auch so viel seine kräftige wirkung in seinen außerswelt-
 ten anlangt. Den verdienst belangend / hat er vns eine ewige erlö-
 sung zu wege gebracht/Hebr. 9. v. 12. Die kräftige wirkung belan-
 gend/sind Gottes gaben vnd beruff ohne rew/Rom. II. v. 29. vnd
 bleibet der H. Geist (welcher diese enverleibung wirket) bey den
 rechtgläubigen in ewigkeit/Johan. 14. v. 16. Diese gemeinschafft
 die wir mit Christo haben / wirdt auch durch andere gleichnussen in
 der Schrifft erkläret: als da Christus genennet wirdt vnser breutis-
 gam vnd wir seine braut. Dann Christus ist vnser/weil er vns vom
 Vatter geschenckt/Johan. 4. vnd dargegen sind wir sein / weil vns
 der Vatter ihme gegeben/Johan. 17. So haben wir auch alle güter
 gemein/wie man vñ weib. Diese gleichnus helt Paulus für/Ephes.
 5. Es führet auch Christus selbst ein andere gleichnus eyn/diese ge-
 meinschaft anzubilden/da er sich Joh. 15. vergleicht einem wein-
 stock/vns aber die gläubige den reben. Dañ gleich wie auß dem wein-
 stock

stock safft fleußt in die reben / durch welches saffttes krafft die reben
 frucht bringen/also fleußt auch auß Christo der heilige Geist in die
 gläubigen/durch dessen krafft sie Gott wolgefällige frucht bringen/
 nemlich werck des glaubens vnd der liebe: das sie Gott auß glauben
 anruffen vnd ihm für alle wolthaten dancken/das sie ihm auß liebe
 dienen vnd gehorsam leisten nach seinen heiligen gebotten.

Diese gemeinschafft nu die wir haben beydes an Christo vnd
 mit Christo / wirdt durch den rechtmessigen gebrauch des heiligen
 Abendmals bestetigt vnd vermehret / in dem der Glaub (durch wels
 chen wir gemeinschafft an Christo vnd mit Christo haben) bestetigt
 vnd vermehret wirdt. Daher Paulus das gebrochene Brot nennet
 die gemeinschafft des Leibs Christi/ vñ den gesegneten Wein/die ges
 meinschafft des Bluts Christi: sintemal vns Christus durch dieses
 Brot vnd Wein bezeugt / das wir gemeinschafft haben an
 dem gecreuzigten leib vnd vergossenem blut
 Christi / vnd also auch mit Christo
 selbst/als vnserm haupt.



Erklärung etlicher strittigen Fragen.

DE RE SACRAMENTI,

Das ist/ Von dem jenigen/ so durch
das Sacrament bezeichnet vnd
bedeutet wirdt.

Obnemlich durch das heilig Abendmal nur allein
das opffer vnd verdienst Christi bezeichnet wer-
de/ oder aber auch der leib vnd das blut Chri-
sti selbs?

Werwol diß bey allen rechten Euangelischen leh-
ren bekant vnd auffer streit ist/ daß die Sacramenta so wol
als das wort vnsern glauben auff das opffer Christi am creus voll-
bracht/ als auff den einigen grund vnserer seligkeit weisen : Jedoch
kan vnd sol nicht geleugnet oder verneinet werden / daß zu dem jeni-
gen welches durch das H. Abendmal bezeichnet wirdt / auch gehöre
der Leib vnd das Blut Christi selbs/ als die victima, das ist/ das jeni-
ge/ welches Christus seinem himlischen Vatter auffgeopfert hat
für vns/ die vergebung der sünden/ die gabe des heiligen Geistes vnd
das ewige leben vns darmit vnd dardurch zu erwerben vnd zu ver-
dienen. Denn ja diß gewiß vnd auffer streit ist/ daß Brot vnd wein
im H. Abendmal zeichen seyen. Sind sie nu zeichen/ so müssen sie ja
etwas bezeichnen vñ bedeuten. Nu findet man aber in diesem handel
nichts

nicht anders das dar durch bezeichnet würde/dann eben den Leib vnd
das blut Christi/ vnd diß bringen die wort Christi mit sich /da er vom
gebrochenen Brot sagt/ Das ist mein Leib der für euch gegeben wirt:
Des gleichen vom eyngegossenen wein / Das ist mein Blut / wel
ches für euch vergossen wirt. Dieses klärlich zu verstendigen/wil ich
stück weis vnnnd ordenlich für augen stellen was beyde die Element
(wie mans nennet) im H. Abendmal / vñ die Ceremonien oder H.
handlungen / so an den Elementen verricht werden / bezeichnen.

Das heilige Brot
Der heilige Wein
Das brotbrechen
Das giessen des weins
ins trinckgeschirz
Die vberreichung o:
der darbietung des
gebrochenen Brots
vnnnd des eyngesse:
nen Weins
Die entpfahung vnnnd
nießung des gemeld:
ten brots vñ Weins
Die narung so der leib
vom Brot vnd wein
bekompt / Item
die sterckung vnd frö:
ligkeit des herzen

bezeichnet
oder be:
deutet

Den Leib Christi.
Das Blut Christi.
Die creuzigung des Leibs
Christi.
Das blutvergiessen Christi.
Die schenckung od zueignung
des gecreuzigten leibs vnnnd
vergossenen Bluts Christi.
Die geistliche annemung (so
durch den glauben geschicht)
des gecreuzigten Leibs vnnnd
vergossenen Bluts Christi.
Die geistliche auffenthaltung
der seelen zum ewigen leben/
Item die geistliche sterckung
vnd freude des herzen/welche
herfleusst vnd entspringt auß
de geschmack der huld Got:
tes / durch Christi offer er:
worben /vnnnd gewisser hoff:
nung des ewigen lebens.

Zum andern ist auch diß gewiß/ daß der HERR Christus durch das H. Abendmal hat wollen versiglen die verheißung / welche er Johannis am sechsten gegeben hat von dem wahren Himmelbrot/ oder von der speise vnd tranck vnserer seelen. Nu bezeuget er aber in derselben verheißung klärlich vnnnd zum offtermal / daß er selbs das Brot seye welches vom Himmel kommen vnnnd der welt das leben gibt/ Item/ daß sein fleisch warhafftig eine speise/ vnd sein Blut warhafftig ein tranck seye/ nemlich eine speise vnnnd ein tranck vnserer seelen/ welche von denselben durch den Glauben in krafft des H. Geists genossen / vnnnd dardurch sie erquicket vnd gesterckt werden zum ewigen leben.

Wie aber sein Leib vns zur speise vnd sein Blut zum tranck worden seye/ lehret er auch darbey / nemlich in dem sein Leib für vns gecreuziget vnd sein Blut für vns vergossen ist worden : wie er dann spricht/ Das Brot das ich geben werde/ ist mein fleisch / welches ich geben werde für das leben der welt.

Hiebey ist auch zu mercken/ was da heisse / durch den Glauben den leib oder das fleisch Christi essen. Diß heisset nicht / ihme selbs einbilden vnd sich vberreden/ daß auß dem fleisch Christi eine lebendige machende krafft verborgener wunderbarer weise in vnseren seelen komme/ gleich wie auß dem körper der sonnen (welcher an seinem ort im himmel bleibet) eine krafft außgezossen wirt/ welche diese irdische körper lebendig machet/ nemlich zum natürlichen leben : Sonder es heisset / Glauben der verheißung Christi/ mit welcher er bezeuget/ daß sein fleisch für vns solle gecreuziget werden/ das ist/ daß er durch auffopfferung seines fleischs vns bey seinem himmlischen Vatter verdienen vnd erwerben werde seine huld vnd gnade / verzeihung aller vnser sünden/ vnnnd das ewige leben. Dann wer diesem zeugnis Gottes glaubet/ der empfehet labfal vnnnd stercke an seiner seelen auß dem geschmack der huld Gottes / damit er nicht von wegen seiner sünden verzage / sonder durch die gewisse hoffnung des ewigen lebens erquicket vnd erhalten werde.

DE PRAESENTIA, Das ist/
 Von der Gegenwart des Leibs
 vnd Bluts Christi im heiligen
 Abendmal.

Ob nemlich der Leib vnd das Blut Christi im heiligen Abendmal allerdings abwesend seyen: oder aber/ob sie etlicher massen/nemlich geistlicher weise/gegenwertig seyen?

Werwol zu besorgen/dasß die lehr von der Geislichen gegenwart des Leibs vnd Bluts Christi im heiligen Abendmal / den einfeltigen jrüge gedanken mache / vund derwegen zu wünschen ist/dasß man sich solcher reden entwehne / vund sich mit den phrasibus der H. Schrifft von diesen geheimnüssen benügen lasse/vnd dieselbige dem gemeinen mann fleissig erkläre: Jedoch weil solche phrasen recht können verstanden werden (wie sie dann auch von etlichen/die sie brauchen / nach der meynung H. Schrifte vnd art des Christlichen Glaubens außgelegt werden) halte ich das für/man solle von wegen dieser lehr keine spaltung oder trennung in der Kirchen Gottes anrichten/Auch nit stracks on allen vnderscheid alle gegenwart des Leibs vnd Bluts Christi im H. Abendmal verneinen oder verwerffen / Sintemal mit warheit kan gesagt werden/ Der Leib vnd das Blut Christi seyen im rechten gebrauch des heiligen Abendmals geistlicher weise gegenwertig / nemlich der glaubigen seele / in dem dieselbe den Leib vund das Blut Christi / laut des zeugnis der Göttlichen verheissung/ erstlich am creuz / darnach im himlischen heiligtumb/ anschawet vnd ergreiffet/vnd jr selbsts zueig-

net / als die victimam, so für sie vñnd alle gläubigen auffgeopfferet
vñnd sie mit Gott in ewigkeit versöhnet habe.

III.

DE COMMUNIONE, Das ist/
Von vnser gemeinschafft mit
Christo / als der glieder mit
dem haupt.

Ob nemlich diese lehr von vnser gemeinschafft mit
Christo / zu der lehr des heiligen Abendmals ge-
höre oder nicht.

Diese lehr wirdt gegründet auff die wort des A-
postels Pauli / da er sagt / Das Brot das wir brechen / ist es
nicht die gemeinschafft des leibs Christi? Der kelch der danckagung
damit wir dancken / ist er nit die gemeinschafft des Bluts Christi?
Dann ob schon diese wort können vñnd auch sollen auff das opffer
vñnd verdienst Christi gezogen vñnd also außgelegt werden / als spreche
Paulus / Das gebrochene Brot des H. Abendmals seye ein Gött-
lich zeugnus / daß die gläubigen vñndereinander gemeinschafft haben
an dem gecreuzigten Leib vñnd vergossenen Blut Christi / als dar-
durch ihnen allen vñnd jeden insonderheit verdienet vñnd erworben
seye vergebung der sünden / die gabe des H. Geistes vñnd das ewige le-
ben: Jedoch kan man die ander außlegung nicht als vnchristlich vñnd
vngereumbt verwerffen / nemlich daß durch den rechten gebrauch
des H. Abendmals in vns vermehret vñnd befruchtet werde die ge-
meinschafft die wir haben mit Christo / als die glieder mit dem
haupt / vñnd als die Braut mit irem Breutigam / vñnd als die reben mit
dem

dem weinstock / welche drey gleichnussen wir droben im Bericht
weiläuffiger außgeföhret haben.

Vom rechten verstand der worten des HERRN / Das ist mein leib.

Ob nemlich diese wort nach dem buchstaben / als ei-
ne eigentliche rede / sollen verstanden werden: ob
der aber ob sie / als eine verblümbte rede / einen bes-
sondern vnd heimlichen verstand haben.

Der weil der leidige streit / welcher sich zu vnser
zeit in der Kirchē Gottes vber dem H. Abendmal erhaben/
vnd nu viel jar hero geweret / entsprungen vnd entstanden ist auß fal-
scher auflegung der worten Christi / mit welchen er das H. Abends-
mal eyngesetzt vnd gestiffet hat / So wil ich kurzen vnd einfältigen
Bericht thun / welches der rechte verstand vnnnd meynung derselben
wort seye. Gott wolle die gnade seines heiligen Geists hiezū verleih-
en / Amen.

Diejenigen die da lehren vnd streiten / daß der leib Christi im
brot des H. Abendmals seye / vnnnd sampt dem brot mit dem mund
gessen werde / die gründen diesen ihren falschen vnd den articeln vn-
sers Christlichen glaubens widerwertigen wohn auff die wort Chris-
ti / da er in eynsagung des H. Abendmals gesprochen / Das ist
mein leib ꝛc. Dis / sprechen sie / sind runde / helle vnd däre wort /
vnnnd sollen nach dem buchstaben / schlecht wie sie lauten / verstanden
werden.

Wenn man nu schon jnen dieses zugebe / würden sie doch jren ge-
meldten wohn darauß nicht schliessen oder erweisen können: Denn

ja diese wort nicht also lauten / **Da** (nemlich in diesem brot) ist mein leib: sonder sie lauten also/ **Das** (nemlich dieses brot) ist mein leib. Aber das diese wort nicht können nach dem laut des buchstaben verstanden werden/ ist klärlich hiebey abzunemen/ das auß diesem buchstabischen verstand notwendig folgen würde/ das das brot des heiligen Abendmals vnd der leib Christi/ nicht zwey vnderschiedene dinge/ sonder nur ein ding seye: sintemal die wort vom brot geredet seind/ das dasselbesey der leib Christi.

Diweil nu offenbar / das diese wort nicht sollen nach dem buchstaben verstanden werden / So folget notwendig/ das sie einen heimlichen verstand haben vnd verblämter weise geredet seyen. Was es aber für eine red seye / vnnnd welches ihr rechter verstand seye/ wessen wir leichtlich mercken / wann wir die reden welche die Schrifft von andern Sacramenten braucht / gegen diese halten vnnnd mit ihr vergleichen werden.

Im alten Testament war die Beschneidung vnd das Osterlamb. Die beschneidung war eigentlich zu reden ein zeichen oder sigel des bunds Gottes/ nemlich des gnadenbunds/ welchen Gott mit Abraham vnd seinen nachkommen gemacht hatte / Genes. 17. v. II. vnd Rom. 4. v. II. Gleichwol spricht Gott / **Dis** (nemlich die beschneidung) ist mein bund: Gen. 17. v. 10. Das Osterlamb war eigentlich zu reden ein zeichen/ nemlich ein gedenckezeichen / des vberschritts in Egypten / Exod. 13. v. 9. Vnd gleichwol spricht **Gott** / Wenn ewer kinder werden zu euch sagen/ Was habt ihr da für einen dienst/ Solt ihr sagen/ Es ist der vberschritt/ das opffer des **H. & X. & N.** / der für den kindern Israel vbergieng in Egypten / da er die Egypter plaget/ vnd vnser häuser errettet.

Gleich wie nu von der Beschneidung gesagt wirdt / sie seye der bund Gottes: vnnnd vom Osterlamb/ es seye der vberschritt des **H. & X. & N.** Also auch vnd in gleichförmigem verstand wirt vom brot des H. Nachemals gesagt / es seye der leib Christi / item vom Wein/ er seye das blut Christi: nemlich verblämter weise zu reden/ da dem zeichen der name des bezeichneten gegeben wirdt. Denn das

das brot vnd der wein im heiligen Nachtmal zeichen seyen des leibs vnd des bluts Christi/ist auffser streit. Sind sie nu zeichen/vnnd werden gleichwol mit dem namen der bezeichneten dinge genennet: So folget hier auß/das solche weise zu reden/nicht eigentlich/sonder verblümt seye.

Ja/sprechen etliche/Diſ geben wir zu/das das brot im heiligen Nachtmal ein zeichen seye des leibs Christi/aber ein zeichen des gegenwertigen leibs Christi/nemlich im brot. Vnnd diſ wollen sie beweisen mit dem exempel der Tauben/welche Johannes der Täuſſer gesehen hat auff Jesum herab fahren/welche Taube in der Schrifft genennet wirt der H. Geist. Denn also stehet geschrieben/Johan. I. v. 33. Auff welchen du sehen wirst den H. Geist herab fahren vnnd auff ihm bleiben/Diſer iſt der da mit dem heiligen Geist tauſſet. Darnach sagt er/Vnd ich sahe etc. Was sahe er aber? Er sahe ein taube/wie Mattheus bezeuget cap. 3. v. 16. Hier auß ist abzunehmen/das der name Geist bey Johanne gesetzt werde für den namen Taube/welche ein zeichen war des Geistes. Nu war aber dieselbe Taube ein zeichen des gegenwertigen heiligen Geistes. Derwegen (schließen sie) wirdt auch das brot im H. Nachtmal ein zeichen seyn des gegenwertigen leibs Christi. Aber diſ folget nicht: Denn es iſt zwischen dem H. Geist vnd dem leib Christi ein großer vnderſcheid. Sintemal der heilige Geist vnendlich vnnd allenthalben iſt/als der wahre Gott/welcher himmel vnd erden erfüllet: Der leib Christi aber iſt vmbſchrieben vnd nur an einẽ ort. Sprichstu / Die Taube seye ein zeichen gewesen nicht der allgemeinen gegenwart des heiligen Geists/nach welcher er allenthalben iſt/vnd himmel vnnd erden erfüllet/sonder einer sonderbaren gegenwart/nemlich der sonderlichen gnade/welcher er die menschheit Christi erfüllet hat mit seinen gaben: Diſ gib ich zu: Aber eine solche gegenwart kan nicht zugeschrieben werden dem leib Christi: Sintemal die gnade vnd wirkung der gaben nicht herkompt vom leib Christi/sonder von der person Christi/so fern er sampt dem vater durch den heiligen Geist wirket in den hertzen der außserwehlt


ten. Diß ist wol wahr/daß Christus mit seinem leib/so fern er denselben für vns am creus geopffert / vns die gnade vnnnd wirkung des heiligen Geistes vom Vatter erworben hat : aber gleichwol wirket der leib Christi selbs nichts in vns / weder in vnsern seelen noch in vnsern leiben. Derhalben hat es nicht durchauß einerley meynung/Wenn die Taube der heilig Geist genennet wirdt / vnnnd zur auflegung gesagt wirdt/sie seye ein zeichen desselbigen: Vnd wenn das brot im Abendmal der leib Christi genennet wirdt / vnnnd zur auflegung gesagt wirdt / Es seye ein zeichen desselbigen. Denn der leib Christi ist nicht bey dem brot / weder nach dem wesen/ noch nach der wirkung/Gleich wie der heilig Geist bey der tauben war nach dem wesen/vnd bey der menschheit Christi nach der wirkung.

Hie möchte jemand fragen/ Ob dann nicht mit den worten des H E X X E N / Das ist mein leib / eine gegenware des leibs bey dem brot angezeigt werde? Antwort / Nein. Dann Christus hat mit diesen worten nicht wollen anzeigen / Wo sein leib were: Dann diß war nicht von nöten / sintemal die Jünger denselben zu gegen sahen : Sonder er hat allein wollen lehren / warzu er vns dieses brot durch das brechen vnnnd dancksagung heilige vnd verordnet. Dann dieser lehr erwarteten ohne zweiffel die Jünger vom H E X X E N / als die da wol wußten / daß der H E X X E N nichts vergeblich oder ohn wichtige vrsach thete vnnnd fürneme / vnnnd aber daß ihm genugsam bewußt were / daß sie numehr bey dem gehaltenen Nachtmal sich satt gessen vnd getruncken hetten. Derwegen hat er sie gelehret / Diß brot seye sein leib / welcher bald darnach für sie vnd für die ganze menge der Außerwehlten sollte gecreuzigt werden. Hie kan ein jeder / der nur ein wenig der heiligen Schrifft erfahren ist/leichtlich sehen/daß diß eine Sacramentliche vnd verblümete red seye / als durch welche der nam des bezeichneten dem zeichen gegeben wirdt. Vnd daß die Jünger die wort des H E X X E N also verstanden haben/erscheinet auß ihrem stillschweigen. Denn so sie gemeinet hetten/Christus redete von einem vngebräuchlichen seltsamen vnd wunderbaren ding/würden sie ihn gefragt haben: sintemal sie

sie auch in geringern dingen solches zu thun pflegten. In summa/
 es ligt nichts daran/es seye gleich der leib Christi gegenwertig (wie
 im ersten Nachtmal) oder er seye abwesend (wie nach seiner Him-
 melfahrt) So ist gleichwol das geheiligte brot im Nachtmal ein
 Sacrament des leibs Christi/das ist/ein heilig zeichen vnnnd göttlich
 zeugnus/mit welchem Christus den Gläubigen bezeuget / er habe
 seinen leib für sie am creuz seinem Vatter auffgeopffert/ihre sünden
 zu versöhnen/vnd ihnen bey dem Vatter genad zu erwerben. Wer nu
 diesem Göttlichen zeugnus glaubet / der isset eben hiemit geistlich
 den gecreuzigten leib Christi/in dem er beruhet in der gnade Gottee/
 welche ihm durch diß opffer versöhnet ist/vnnnd frewet sich derwegen
 vnd lebet in Gott. Vnd zwar wer sich mit diesen grossen wolthaten
 Gottes nicht benügen leßt / sonder wil noch darzu eine gegenware
 des leibs Christi im brot oder in seinem leib oder seel haben / Der hat
 niemals recht erwogen / was es für ein groß ding seye / Göttliche
 zeugnussen vnd gleichsam sigel vnd brieffe haben / durch welche wir
 der verzeihung der sünden vnd des ewigen lebens/ durch Christi todt
 erworben/gewiß seyen.

In summa/ Es gebüret getrewen Lehrern vnd dienern des worts
 Gottes/das sie die einfeltigen fleißig vnderweisen/ Warzu der
 HERR Christus sein heilig Abendmal habe eyngesetz vnd verord-
 net/vnd auch was er dadurch in seinen Gläubigen wircke: Nemlich
 das er vns dadurch fürbilden vnd also zu gedechtnus führen wil sei-
 nen todt/auff das er von vns für das werck der erlösung mit danck-
 sagung gepriesen werde / vnd vnser Glaub durch solche vbung er-
 weckt/gesterckt vnd vermehret werde. Vnnnd gleich wie Christus
 durch das heilige Abendmal zu diesen zwecken ziele vnnnd die ganze
 handlung dahin richtet / Also wircket er auch eben dasselbige durch
 dise werckzeuge in den Auserwehltten / in krafft des heiligen Geists.
 Darauf dann folget/das das brot vnd der wein im heiligen Nachtmal
 nicht läre oder blosse zeichen sind. Denn ob sie schon nicht auß-
 gefüllet oder angezogen sind mit der substanz oder wesen der bezeich-

neten dinge / so sind es dennoch kräftige zeichen / das ist / werckzeu
 ge des heiligen Geistes / welche er kräftiglich brauchet den Glau
 ben in seinen Auserwehltten zu stercken / vnd also ihre gemeinschafft
 mit Christo zu vermehren. Gleich wie er auch das Euangelium
 gebrauchet / den Glauben beyde zu geben vnd zu erhalten : Daher
 dann dasselbe von Paulo genennet wirdt eine krafft Gottes selig zu
 machen alle die daran glauben / Rom. I. v. 16. Derhalben sollen sich
 trewe Lehrer in den fußstapffen der heiligen Schrifft halten / vnd in
 summa lehren / daß der ganze handel der Sacramenten
 in der geistlichen bedeutung vnd Gött
 licher wirkung des heiligen
 Geistes bestehe.



Was Sacrament machet nicht/dasß Jesus Chri-
 stus erst anfang zu seyn das Brot des lebens / sondern in
 dem er vns durchs Sacrament erinnert / dasß er vns einmal das les-
 bendige Brot worden sey / auff dasß wir stets damit gespeiset wür-
 den / gibt er vns auch dasselbige Brot zu kosten vnd zu niessen/vnnd
 macht also dasß wir dieses Brots krafft empfinden. Dann es vns
 vergewisset / dasß alles was Christus gethan oder gelitten hat / zu vns-
 ser Lebendigmachung geschehen sey: Zu dem/dasß diese Lebendigma-
 chung ewigwährend sey/dardurch wir ohn vnderlass genehret/gestew-
 ret/vnd erhalten werden im leben. Sintemal/gleich wie Christus
 das Brot des lebens vns nicht worden were / so er vns nicht einmal
 geboren vnd gestorben/vnd auferstanden were: Also were er jezund
 dasselb auch nicht/ wann die krafft vnd frucht seiner Geburt/Todes
 vnd Auferstehung nicht ein ewigwährend vnd vnsterblich ding were.
 Welches alles Christus schön aufgedruckt hat mit diesen Worten:
 Das Brot welches ich geben werde/ist mein fleisch / welches ich ge-
 ben werde für das Leben der Welt. Damit er ohn zweiffel anzeigen
 wil / dasß sein Leib darumb vns ein Brot seyn werde zum geistlichen
 Leben der Seelen / weil er vmb vnser Seltigkeit willen in den Tode
 hingegen werden solte: vns aber gereicht werde zu essen / wann er
 durch den Glauben vns sein theilhaftig macht. Derhalb hat er
 denselben Leib einmal gegeben / auff dasß er ein Brot würde/ als er
 ihn zur Erlösung der Welt zu creuzigen hingab. Täglich aber gibt
 er ihn / wann er durch das wort seines Euangeliums sich vns an-
 beut/auff dasß wir sein theilhaftig werden / so fern er für vns
 ist gecreuziget worden: vnd folgendts solche gemein-
 schafft durch das Geheimnis des Abendmals
 versiglet: ja auch innerlich erfüllet/
 was er eusserlich anzeiget.

106595

LIBRARY OF THE UNIVERSITY OF CHICAGO

[Faint, mostly illegible text, likely bleed-through from the reverse side of the page. Some words are difficult to discern but appear to include:]

LIBRARY OF THE UNIVERSITY OF CHICAGO

106595

106595